

**Sinerissami tarnimikkut napparsimasut sullinneqarnerisa pitsaassusaata ukiut tamaasa nalilersuiffiqineqartarnissaa siunertaralugu Naalakkersuisut peqquneqarnissaannik Inatsisartunit aalajangiiffigisassatut siunnersuut. Naliliisussat tassaassapput atuisut sulisullu ulluinnarni pineqartunik sullissisut.**

(Inatsisartuni ilaasortaq Agathe Fontain, Inuit Ataqtigiit)

### **Akissuteqaat**

(Peqqissutsimut Attaveqarnermullu Naalakkersuisoq Steen Lynge)

### **Aappassaaneerpeqarnera**

Ilaqutariinnermut Peqqissutsimullu Ataatsimiititaliap siunnersuummik sukumiisumik suliaqarnera qujassutigeqaara. Ataatsimiititaliap isumaliutissiisummini 2012-imi tarnimikkut nappaatilinnik sullissinnermut atatillugu suliniuteqarnerup 2013-imiit 2017-imut ingerlateqqinneqarnissaa pillugu Naalakkersuisut pilersaarutaannut- 2010-mi *tarnimikkut nappaatilinnik katsorsaaneq pillugu nassuiaammi* kiisalu *sulinerup nanginnissaanut pilersaarutini* saqqummiunneqartumut tapersiinera, Naalakkersuisut nuannaarutigaat.

Napparsimasup attavigisartagaatalu katsorsaannermi suleqatigiilluarnerisa katsorsaanerup angusaqarfiulluarnissaanut annertuumik pingaaruteqarnerata ilisimaarinera pissutigerpiarlugu, tarnimikkut nappaatillit katsorsartinneranni Peqqinnissaqarfimmit napparsimasoq tamatigut peqataatinneqartarpoq peqataatinneqartuassallunilu. Assigiinngitsunik periuseqarluni naliliivigisassallu assigiinngitsut naliliivigineqarsinnaanerit, sulinerullu attuumassuteqarnerusumik ataavartumik nalunaaruteqarfiusinnaasumik sullissinerup - pisariaqarpat allanguuteqartinnissaanik, naleqqussarnissaanik pitsaanerpaaffissaaniititsinissamillu qulakkeerisinnaasumik naliliisoqarsinnaanera, Ataatsimiititaliap isumaliutissiisummini tikkuarpaa.

Anigugassaangitsumik tarnimikkut nappaatilinnik katsorsaanerup ukiut tamakkiallugit naliliivigineqartarnissaannut atatillugu aningaasartuutaajumaartussat pillugit nassuiaasiortoqarnissaa, Ataatsimiititaliap immikkut kissaatigaa. Siunnersuutip siullermeerneqarnerani peqqinnissakkut sullissinnermut atatillugu aningaasartuutissanik naammattusaariniarnermut ilungersunareeqisumut immikkut aningaasartuutaanissaa, tarnimikkut nappaatilinnik katsorsaannermut annertuumik sunniuteqarsinnaasutut naliliivigineqarpoq.

Taamaammat naliliisarnerit ulluinnarni sullitanik attaveqarnermut naleqqussarsinnaangorlugit sulinerup attuumassuteqarnissaannik Ataatsimiititaliap inassuteqarnera, Naalakkersuisut naammagisimaarpat.

Naggasiullugulu siunnersuuteqartoq siunnersuutaa- napparsimasut taakku nappaatip immikkuullarissusaa pissutigalugu immikkut ittumik maluginiartariallit, tungiortariallit peqataatinneqartariallillu atugaasa pitsanngorsaavigineqarnissaannik annertuumik kissaateqarnermik tunngaveqartoq pillugu, assut qutsavigeqqikkusuppara.

Taama oqaaseqaateqarlutik siunnersuutip taama isikkoqarluni akuersissutigineqarnissaa Naalakkersuisut inassutigaat.